

韋蘇州集

冊一

章國朝集

韋蘇州集

四部備要

集部

上海中華書局據項氏繙

宋本校刊

桐鄉 陸費達總勘

杭縣 高時顯輯校

杭縣 丁輔之監造

韋蘇州集序

韋蘇州唐史不載其行事林寶姓纂云周逍遙公奩之後左僕射扶陽公待價生司門郎中令儀令儀生鑾鑾生應物應物生監察御史河東節度掌書記慶復李肇國史補云爲性高潔鮮食寡欲所居焚香掃地而坐其爲詩馳驟建安已還各得風韻詳其集中詩天寶時扈從遊幸疑爲三衛永泰中任洛陽丞京兆府功曹大曆十四年自鄆縣令制除櫟陽令以疾辭歸善福精舍建中二年由前資除比部員外郎出爲滁州刺史改刺江州追赴闕改左司郎中貞元初又歷蘇州罷守寓居永定精舍其後事迹究尋無所見肇又云開元以後位卑而著名者李北海王江寧李館陶鄭廣文元魯山蕭功曹張長史獨孤常州崔比部梁補闕韋蘇州以集中事及時人所稱考其仕宦本末得非遂止於蘇邪案白居易蘇州答劉禹錫詩云敢有文章替左司左司蓋謂應物也官稱亦止此有集十卷而綴敘猥并非舊

韋蘇州集卷第一

蘇州刺史韋應物

古賦一首

冰賦

雜擬二十一首

擬古詩十二首

雜體五首

與友生野飲效陶體一首

效何水部二首

效陶彭澤一首

燕集二十一首

大梁亭會李四栖梧作一首

燕李錄事一首

淮上喜會梁川故人一首

揚州偶會前洛陽盧耿主簿一首

賈常侍林亭燕集一首

月夜會徐十一草堂一首

移疾會詩客元生與釋子法朗因貽諸曹一首

慈恩伽藍清會一首

夜偶詩客操公作一首

與韓庫部會王祠曹宅一首

晦日處士叔園林燕集一首

扈亭西陂燕賞一首

古西郊燕集一首

春宵燕萬年吉少府中孚南館一首

滁州園池燕元氏親屬一首

郡樓春燕一首

南塘泛舟會元六昆季一首

郡齋雨中與諸文士燕集一首顧況詩附

軍中冬燕一首

司空主簿琴席一首

與村老對飲一首

古賦

冰賦

夏六月白日當午火雲四至金石灼爍玄泉潛沸雖深居廣廈珍簾輕簾而亦鬱鬱燠燠不能和平其氣陳王於是登別館散幽情招親友以高會尊仲宣爲客卿睹頒冰之適至喜煩暑之暫清王乃誇賓而歌曰含皎皎兮瓊玉姿氣淒淒兮奪天時飲之瑩骨兮何所思可進於賓請客卿爲寡人美而賦之客諾曰美則美矣而大王不識其

短夫謂之瓊玉竊名器也氣奪天時干陰陽也內熱飲之媒其疾也
寵一物而三失德且出寒暑而至下薦宗廟而至高僕竊感之而歎
歎安得而不爲之抽毫何積陰之勝純陽兮惟此玄冰居炎天之赫
赫兮獨嚴厲乎稜稜其始也月玄冥日北陸天地閉水泉縮動靜一
變剛柔反覆壯以烈風積如羣玉由是依廣瀟漫憑高崢嶸大寒御
節萬物潛形浮彩浩浩仰吞素靈羣山早曙陰壑夜明古者祭之黑
牡其藏以節袂之桃弧其出以潔今明明大魏禮物必備實大王罇
俎之常品非小民造次之所致若尊卑異等頒命有度碎似墜瓊方
如截璐況粉壁雲矗象筵霜布座有麗人皎然俱素雖衆賓之同輝
諒爲物之難固其竊名假質以謬一時之賞也如此若乃對脩竹臨
方塘俾炎作寒兮反我天常嗟絺綌之失御於三伏兮亦紈扇委篋
而內傷其嚴沍之威以干陰陽之候也如此若皎潔的皪與時消釋
或沉珠於杯或化璞於液王將甘飲聊以自適豈知乎一寒一溫日

夜相激久之以生疾兮內外不和而怵惕其翫意而媒疾也如此觀其劣足以淒一室利庖廚俾甘肥晚敗醇釀不渝非可調湊理安營魄奈何以誇客陳王於是赅然而慙曰寡人生於深宮懵於服食左右唯燕姬趙女侈服美色微客卿之言則何以雪余惑方當命有司而撤冰書盤盂以自式

雜擬

擬古詩十二首

其一

辭君遠行邁飲此長恨端已謂道里遠如何中險艱流水赴大壑孤雲還暮山無情尙有歸行子何獨難驅車背鄉園朔風一作吹卷行迹嚴冬霜斷肌日入不遑息憂歡一作懼客髮變寒暑人事易中心君詎知冰玉徒貞白客一作容

其二

黃鳥何關關幽蘭亦靡靡此時深閨婦日照紗一作綺窗裏娟娟雙
青娥微微啓玉齒自惜桃李年誤身遊俠子無事久離別不知今生
死

其三

峨峨高山巔浼浼青川流世人不自悟馳謝如驚鷗百金非所重厚
意良難得旨酒親與朋芳年樂京國京城繁華地軒蓋凌晨出垂楊
十二衢隱映金張室漢宮南北對飛觀齊白日游泳屬芳時一云遊
冶詠康時平生自云畢

其四

綺樓何氛氲朝日正杲杲四壁含清風丹霞射其牖玉顏上哀轉絕
耳非世有但感離恨情不知誰家婦孤雲忽無色邊馬爲迴首曲絕
碧天高餘聲散秋草徘徊帷中意獨夜不堪守思逐朔風翔一去千
里道

其五

嘉樹藹初綠
靡蕪吐幽芳
君子不在賞
寄之雲路長
信難越
惜此芳時歇
孤鳥去不還
緘情向天末

其六

月滿秋夜長
驚鳥號北林
天河橫未落
斗柄當西南
寒蛩悲洞房
好鳥無遺音
商飈一夕至
獨宿懷重衾
舊交日千里
隔我浮與沉
人生豈草木
寒暑移此心

其七

酒星非所酌
月桂不爲食
虛薄空有名
爲君長歎息
蘭蕙雖可懷
芳香與時息
豈如凌霜葉
歲暮靄顏色
折柔將有贈
延意千里客
草木知賤微
所貴寒不易

其八

神州高爽地
遐瞰靡不通
寒月野無緣
寥寥天宇空
陰陽不停馭
貞

脆各有終汾沮何鄙儉考槃何退窮反志解牽跼無爲尙勞躬美人
奪南國一笑開芙蓉清鏡理容一作雲髮褰簾出深重豔曲呈皓齒
舞羅不堪風慊慊情有待贈芳爲我容可嗟青樓月流影君帷中

其九

春至林木變洞房夕含清單居誰能裁好鳥對我鳴良人久燕趙新
愛移平生別時雙鴛綺留此千恨情碧草生舊迹綠琴歇芳聲思一
作願將魂夢歡反側寐不成擘衣迷所次起望空前庭一云擘衣迷
處所夕起望前庭孤影中自惻不知雙涕零

其十

秋天無留景萬物藏光輝落葉隨風起一作遠愁人獨何依華一作
明月屢圓缺君還浩無期如何雨絕天一云如何雲雨絕一去音問
一作塵違

其十一

有客天一方寄我孤桐琴迢迢萬里隔託此傳幽音冰霜中自結龍鳳相與吟絃以明直道一云絃以昭清直漆以固一作形交深

其十二

白日淇上沒空閨生遠愁寸心不可限淇水長悠悠芳樹自妍芳一云自交結又云房櫺正妍鬱春禽自相求徘徊東西廂孤妾誰與儔年華逐絲淚一落俱不一作難收

雜體五首

沉沉匣中鏡爲此塵垢蝕輝光何所如月在雲中黑南金既彫錯輦帶共輝飾空存一作有鑒物名坐使妍蚩惑美人竭肝膽思照冰玉色自非磨瑩工日日空歎息

古宅一作宇集秋鳥羣號枯樹枝黃昏窺人室鬼物相與期居人不安寢搏擊思此時豈無鷹與鸇飽肉不肯飛既乖逐鳥節空養凌雲姿孤奉肉食恩何異城上鷗

春羅雙鴛鴦出自寒夜女心精煙霧色指歷千萬緒長安貴豪家一
作室妖豔不可數裁此百日功唯將一朝舞舞罷復裁新豈一作寧
思勞者苦

同聲自相應體質不必齊誰知賈人鐸能使大一作音樂諧鏗鏘發
宮徵和樂變其哀人神既昭享鳳鳥一作皇亦下來豈非至賤物一
奏升天階物情苟有合莫問玉與泥

碌碌荆山璞卞和獻君門荆璞非有求和氏非有恩所獻知國寶至
公不待言是非吾一作語欲默此道今豈存

與友生野飲效陶體

攜酒花林下前有千載墳於時不共酌奈此泉下人始自翫芳物行
當念徂春聊舒遠世蹤坐望還山雲且遂一懽笑焉知賤與貧

效何水部二首

玉宇含清一作秋露香籠散輕煙應當結沉抱難從茲夕眠

夕漏起遙怨蟲響亂秋陰反覆相思字中有故人心

效陶彭澤

霜露悴百草時菊獨妍華物性有如此寒暑其奈何掇英泛濁醪日
入會田家盡醉茅簷下一生豈在多

燕集

大梁亭會李四栖梧作

梁王昔愛才千古化不泯平聲至今蓬池上遠集八方賓車馬平明
合城郭滿埃塵逢君一相許豈要平生親入仕三十載如何獨未伸
英聲久籍籍臺閣多故人置酒發清彈相與一作將樂佳辰孤亭得
長望白日下廣津富貴良可取一作求竭來西入秦秋風旦夕起安
得客梁陳

燕李錄事

與君十五侍皇闈曉拂爐煙上赤墀花開漢苑經過處雪下驪山沐